

# KOTAVUSA VIRDA

KOTAVUSA VIRDA VESTASA VA TAMAVA IS ARAYEEM MU AYIKEEM

Santoleaksat ke 2022

2<sup>e</sup> otuk

Kotava, tela tamefa golerava  
Va ina kosmac !!







## Danebury ~ Keltafa ralma koe Engla

Ralma ke Danebury tir tan jontik folkayenaf debak ( englavon *hill fort* ) kolnayan vagee Engla wali 1000 AGJ is 500 AGJ. Batlana ralma exonoyena moe denoxa tiyid dodafa widega ke bane sare ; va dolexo is katanaxo katecton gu alkafa jora is gelbe todon gu wupe zanudayad.

### Keltafa ralma

*Hill fort* ralma wale ontinafo tawapiexo is titsuyaf kelor remo tuvel koe rojusa migexa anton zo rovansayad. Koe anambe, rea solparseyena gu joya va yon tum dem ivamufa mona is emacek dem olkxe is onya is zaipak suxayan koe sid kabelcayar. Ralma tiyir av ke lizukafa blira : vemafa tawamidusa doda va warolaks abdaraykayar ; dere tiyir tegiraf av ke yon yambudik isu dolekik isen alkafa jora koeon zo grustayad. Va gelbe bak skaltafa rekola dere yordayar, bravason va sanelia do bonoleem is kiewegeem is keson va tena ke wupe.

Yona decemoya *hill fort* ralma koe Britana pakon zo joxayad. Rawopaf orig kayestayan novel da va vieleafa blira koe britanaf ewaleem bak Azilugal abdi romafa tolgenira lokiewon grupet.

Bak idulugal ke 1969, Barry Cunliffe britanaf rawopik va bralasa brimga koe Danebury debak tigus koe Hampshire gola vagee Engla suxar. Kaliapon sonker da tum dem jondecemdaf aal tice bria va abdiizvugalafa ralma savsafa gu 2500 tanda kidar. Aal comayan gan nyul zo baliad. Bam rawopik romaltegid ise va debak



kojoxad abdida seg di zo ikataplekur. Joxara tolsandon jijad. Danebury va intyona birga adre mobilder, darpe kot idulugal, isen rawopik va loon lik ke welma vas aluboy divatces decemiray ke ralma lajuvestad.

### Folkayeem

Folkayera va Danebury bria moni -600 tozuweyer, ton vegedura va intanuku ontinafu gu mon 4 m- ruldasu vas pakap ke briotsa. Nuku gu tawapiexo zo tuprantayar isen vabdueon suxayan kelor va rojus bolk tuzegodayar. Mulafa artazukara moni -400 dilizeyer : intanuku gu granafa migexa arte vekoraf kelor zo ikaplekuyur. Soluma wale otsa ke ve is ontinuk ke migexa tiyir vas mon 16 m- numen kota urpera zo tuwavdayar moekote tode ruzadesik gu tcanda dem mimadjo miledje zo aorayad.

## Kotavaf Izvugalayak [-1000 – -800 : Asia is Pacifika]

*Sinka is Anameda — Irubara is Vegedura — Ckane is Gandura — Yamba is Miga*



Plebota, Sinia

### ULIRA VA VOR

Koe Sinia vor koe migaf firviks ke atayera va abdigadikeem volayar. Fli ke jontik migaf trig tiyir belcetara is aotcera va vor, isen sinaf tazuk kare koplera va aftaf vor ok vor batakap dum vrod arapenyid. Bata toloya apta vey kacayas olk zo malseotayar, i vey jadion plebot. In arti tanoy mielcek kadayar. Voxen aftaf vor, tis dugackaf, va konak aksat maldineyer. Vor kan iyekotafa sarmama zo uliyir.

Buta, Mongola



### BUTA

Moe domega ke Murray bost getalte Australia, enk dem buta ilsuxon ice kalke wetce pemaxo gan anlizu-kafa tcabaneyestasa lospa remi aluboya decitda dun zo kereleyer. Voxen sina va kipi ke tanda arlize ape tiskiyid, rotir poke krimta.



Ralma remi 150 tanda gan tawamidusa doda ke bemafa azeka zo faveyer. Lo irubasik va tcastaf diel koe azeka aname bria kereleyed. Irubasikafa ota ke folkaykirafa wida arse meviele tiyir vas lo 200 korik.

Kolna ke wida tiyid ke toloy ord : mona is olkxe. Ivamufa mona dem xakola vas mon 6 m- kake migexa bravon gu suka tigiyyid. Teyxo is cade is kela ta abdaraykara va sinka is aryona xa koeon zo senuyud. Rontagentimafe olkxe giskinafe gu granaf intagerot va ontinafa abdaraykara noveyed. Batkane sinka tiyir bravon gu sebadadunol is lo dasaf sulem.

Tawamidura tiyir nelkafa tegira ke vemaf irubasikeem. Tawadayik va namulol is jaftol is bulol varteyed ; va dent is olyub koe taya aname bria miduyud. Conyuta ke kelda malsaveyena gan bonoleem bazed da ban sin kal folkaykirafa wida zo stayad lize di zo balieyed ( konak cele-moy xim isu niska koe anambe zo katrasiyyid ).



Blotafa vertuma tiyir omavon gu zaipaf warzeks isu sulemaf. Bonol va atela is vroda warzeks ( vrod is bluda ) tiskayad ; zaipa ton regelta

ta beg is kurfa zo glefayad. Ilt is kuldenga is voja is ruxa is wikande is dieke dere tiyid ke rude ke azilugalafa sanelia. Malsavera va bireip koe Danebury gan kosmara va stogoyeks ke tawoldafa sarma suyusa va conyuta ke eip zo

gruyer. Eip, i benelafa tadlexa ke blotara, ta videra va atela dere zo faveyer.

Femura is layera tiyid pak ke gubef tegireem ke kwafa blira koe Danebury. Vafa namulolafa bayna kan loitesiki kum barmada ik niskada taneon zo loiteyer aze kan nuba is jepkeda dem raporafo ok kuritcafo kevaldo zo femuyur. Azon bayna keve xufa rujda zo layeyer. Lay kan ruxafa biaxa ape zo biayad.




Azilnyofasik va azilafa ik iyekotafa xeka isu ingaxa iayad. Fwek malu geefa krimta kal Danebury zo vanlizukeyer aze ta epura va mak di malsaveyer.

Kotcoba obar da irubasikeem ke Danebury va migura is diolura lomegayad. Va okolafa oria oku jaftolafa trumon daykayana moe ludev koe kela zo katrasiyyid. Ara kela vas empa ke trocadayaf trig dovoron nuvarbeyen ruldayad. Irubasik va sinka pu lorik ika warolaksany rotir firviyyid.

*Nuyafa ewava male internetxo : <https://commons.wikimedia.org>*

Internetxo : **Kotava : langue, littérature / ava, suteroteem**

<https://kotava1837481.wordpress.com/2018/11/09/izvugalayak-1000-800-pacifika/>



Cade ta warzera  
va iyekot

#### AYNARA VA IYEKOT

Nyofara va iyekot wan tiyir zolonafa koe Sinia. Bat vangluyaks tiyir dem lut vas 90% is vopel vas arak, isen kojera koe vuka tuidulana koe intadacade zo sopuyur. Aynara remruson va trekam tite vuka zo seotayar ; stana kan narilt div cade, ko cupa zo kayestayar. Azon fostula gire zo jeyed, iatason va warzafa iyekotafa xa.

#### KOSUTEKS KEVE IYEKOT

Siniat iyekot trig ta anton migafa yazgara mea zo faveyed voxe gu kosuteks stragas va tikira wal nafalik is detceikeem zo gretcayad. Lan kosuteks va bifapa dum winugafa koflira ok sayakafa cenera ok kaxaara va taway ik levetirik aflayad. Va rieta lolofereon muxayad, i va rieta da roti sometir vey loraf nelkot vols lidafa vexe, i vey vexe ruyesa da bowerenye va bolik dem waldafa roka isu goni sorupter, i va bolik kagrupen gan kottan.



Iyekotaf trig, Sinia





Artazukera va canak ke koti tacukafi koeti dere tikir : fey akintakoron atcewed, akinta vokewed, edje bada pakon tulivawed.

Vexe, dum darevielon, levgon tazukinda toz dzavewed, sinaf bitej toz sionad ; Gradilik, vion, va giwasa jowa dimon vomlanir.

## II : Baerdafa brinuga

Pcexu grelt lente tuvel ke alizmonafa dopewapa vukir lize ant okilik kolanid. Koe artexo kotrafo gu koca, valeve ayedikyefa ewava ke awalt, baroy gertapik tigid. Valeve sin, moe moavayafa eka, san-toloy pinotaf wetasik.

Gradilik abdulanir, va eaftafa remlanira va Ksur aalxo pwadecker, terektanon gan gorestapaf is gevan gertik gildas va tuaxara va intafa gijarotiuca lente bata merotenvana stuva.

Ilamaf gertik diner da grelt pu Awalt va san-toloy jaftol is peroy astopol is baroy okol firvir. In kagrufer da tazukinda va yon loraf pilkovoy did, aze, vani wetara, va baerdafa brinuga gorar.

Kot gertik isu okilik ke Zaxelal cos fu gotcoked.

Nume staksik va yona venta isu azeka exuled, kale decemoy lieue solumolk aname xo lize diolikafa Agmatana enekeon zo kolnatar. Kotlize ozgodafa rupa va im ke ayik rar, kotlize okilik va gertafa rozara ekeyuson veged.

Langazdon movugalon, Awaltye va rujod remrur, va dopewa perdoer, va muxelk zomer lize forteyasa takra ke jaftol vikizar. Gertapik is vikeasik, i alub-sanoy greltokilik, xultuson kizoyud. Vunttoy alizmonik, diveon, sistason va fedafa zarenda, va kievera toliegad, vodjuson va socelanafa taka van sistemeso Ksur aalxo. Abditaks tir kuvaf.

Bam, do kabdueon gertik, kotafe sane rem aalxo lanir. Bak kiel, moni bare bartiv, gradilik ke Pcexu va tari azavzar. Sentapa tublakerana gan movugal, dem tcalist dem agafa toa preyutasa va tij, ilamkon stokewer ; gertik va aneyana is gosontena is govandilina coba moe doma ke klita kozwid, i va yona tazukinda. Sina tid zijnafa bene disukera, leve aalafa izga, dem skotces nideks is karaf tey ke intaf bitej, ton aulafa towara drume klita.

— Batlize, ~ ilamaf gertapik kalir, ~ va wetara gofirvit enide sina gruped da va int gu sinafa gijarotiuca levplekut !!

Kot guazik blaganyad. Puda madawer, wori. Tir Yucik, ke Nom grelt, i jotaf patasik va koca, i zwaf katcilaf rubasik dem tozifa sposuca, pirton erus da va tazukinda loon vanlanid.

Vexe guazik, tubatakayan koe yamba va proyafa ewa, xultud : muxelk zo vegedur, kosik zo



vanstar, i baalpese okolye sotise ilamtaf zanisik va ayik. Bam, koe amlit is pirilera ke sane, iyekotaf wed va oluafa takra ke sulem trasir. Tamarapa madawer. Aze gertapik :

— Kas zo vandilic, ey lorik ?

Banlize, vanmiae amlitaf ulim, tazukinda wan pridud, va int afigasion, abdualbason va runda liz awaltara lodekemon traspur.

— En, en, ~ seramik iegar, ~ sin zo vandilid !

Aze konariyison va idulafa takra ke okol, teka gertapik rilitaf va tanoya ewa tiyar, Yucik ko senta iper. Konak ukik, evieson, radimlanid. Vion, tazukinda dzavewed, va sint belcason drume sid, aze, levgon va rulokikeem iped, nume arubana stakera va alub-sanoy grelt kovudar.

Tevoy ok peroy otesik, askifoapason, elodenon onkan, va kima lajuvomvulted. Kotar al blir is don Yucik.

— Tid volrokeldaskin lorik ! ~ gertapik fawokon kalir.

Aze pirdot kabelcawer, i mokraf pirdot ke gertapikeem is abdigadikeem is okilikeem.

Sin va conyukara va nukanambe kaike giwasa kima gorad, ise ta gotura va bate anambe poad da levetirik gan tazukinda caneon zo laxudilfud.

Aze batcoba zo skur. Dratcenon gu xonukara, levetirik va anambe kolanid. Wori, oye donafa xelkara vug xonukad. Jowa re tir acon exoneyena, turowinana pu kottan kan nukanambe.

Batinde baerdafa brinuga fikunton tenuwer, nume Zaxelal saneik gu bat rukuzaf volnik zo fokealnendad.

### III : Mielak

Vexe djis bolk ixulen gan pirdot, fure nijur merotaskis. Direimwugalon, Xertot grelt isu Nazum, pokolanison va nukanambe, merodaxason is tcastamon, gan yona tazukinda uduton zo ruzaded nume zo tsalad.

Okilik divvawayas va stakera pu Zaxelal pirdotap pwaded da tazukinda re tigid loote dam daremuvugalon. Soe, dum daretomon, va onkara kimad, vexé jowa al zo tumantad.

Bat warzot va sane yondad : sugawalkap is yona wetarapa dilized. Azon, pirdot gorar da kan tey va Ksur aalxo di govilar.

Damo konaka yawara, ant dom zo lajufirder.

Bam, gripokolen gertik va aalxo ziliyad ise kalpoud da kottan kolanir. Aze konak idulugal tiskid.

Lanmielon saneaksaton, kenibeso pemaxo ke Zulf grelt, arte sanoya trasoluma male baliafo aalxo, gan yona tazukinda zo tolgenir. Ware bar-decemoy gejik blidrasud.



Batvielu grenyafa is solelasa is bulafa rupa greltgrelton remfir, prejana ko oblaka, sielon, remi kocaf mielcekap ke Mesopotama. Ayik fu soxonukar. Ban tisik, sovonewes, koe aalxo is azeka, merovilan, vielvielon va aytcura zaava fu sovumber. Nume odiaxaca, kivasa is ebeltafa, va kota kimtafa kerava veber, va lyumarapo gu kottan deswar, i va jebesa kiewatrakureva ke jotafa zaava. Krabesik, klokas va batcoba, va kulupafo nazbokafo baspexo mea rovebalbar, kan kalanzanu etcu va ticeon otsa ke koceem trasir. Tir decite ilana ke rumeafe sane, i sorga ke tena ke tamava, ok rotir trobindara ke kerik ke indiafa meila.

Nume, golde bata polera, kobrasik piron toz atayed, va atay va awalk tujden gan katcilajik, i va atay va mielak gijarotif loon dam koceem, i va mielak koartokatas is vumbetes va tumtafi afi, i va draydes tey.

Kotlize, poke antiafa coyunta, mezekasa is tuwiputaweyesa brucka ke koswavanik zo rokakeved, amlitik va sint vanmia grelt dile tutcastad ise va mayakafa klokara kareizud, i va Nom ke vanfis Mielap, i va ilblis Awalt.

## IV : Baxun

Okie, batugale, Baxun blir, i volunaykikye ke Ptux staba is berik ke Zaxelal taneaf gertapik. Mali yugal, va alizmonafa blira al bulur ise va listafa antiuca wale balemoya venta koe blikiraf sakam al kiblar, lize dankasa aftuca ke klita vokewer. Pistokki va inafa titickafa broca tadled, i va gulikafa oga. Keuca is pomara ke yon jaftol isu okol va sivakuca is cug belaf warolaks al daskid. Inaf balemoy kurenik is bar-sanoy nazbeik blid inde koe fuda co-tigid.

Baxun va yona manafa rieta er. Kabe tarkara ke Zaxelal grelt va taneaf berik ilamtaf gertapik, pune zo co-raporgayar.

Taneon, er da deblitafa blira tir kiewafa loon dam alizmonafa blira, fromeson va ayapo ika swava ;

Toleon, trakur da Awalt is Tael is kot bitej me tid lorik vols afiak ;

Bareon, trakur da ayik va wazdeks ke Sabera anton gofolir.

Zaxelal greltik va diolafi roti pu in yofted, ise konak rulokik, dile, laxuruped. Someiregled. Lantan al welidad da in, ziliwaleson va bliga, va volkalaf grelt jontikviele al pomar.

Okie ba ebeltaf bartiv, viele kexafa kiblara va jovlera va nazbukafa coyunta lodam vilara ke banyona volrodeldaskina lorinda, awir, pune grelteem va Baxun modovad nume dace miv gertik, arti intotcafa lyumarapa, va baroy zolonik ke sinaf veem krinad.

Baxun va negeem wesidon kalterektar, volmiv tolkalir, jontikviele is elimon biber. Va kobrasa tolka erur. Artion, opelon dokter da va vayara va tazukinda fu ektudar.

Grelteem zo agalemer kire al pokoler da Baxun va coyunta diweduson di rotunuyar. Soe okilik vanyed kalaf gu inaf goraks ise va yona zolonaca pokoled.

Batvielu, Baxun poke Ksur aalxo va int player, buluson ba tilderugal, vox kotafizcekon dizveson,



moe tel lokaliaf okol ke Kalda. Fure, buiven gu louca ke inaf cuisaf sulem kare beta tuzafa tazukinda, va volnik ke ayik laoon is pintoton toz rovayar. Abdisuterafa nevapa dem per-sanoy dov tir daskiks ke bata inafa vayara, i tela lolistafa raporafa neva iskemayana gan alizmonugal pu wita zaaveem.

Koe bata neva, gomafelana gu inafa keafa dizvera is pufuca, blirabolk voltoltavaf gu sulemaf bliind isu ruxaf zo rabater, lize Baxun dulkon welidar da va tela rilafa laviuca isu kevak anton al rodrunar. Belison va bata pimtara, kot ayik sosuster. Baxun va batyon tisik gu Xipehuz yoltar. I va yona fentalafa pinta, mekon turibiegarsayana, icde sinyona tegira is sinafa nirinda isu lyumarinda isu nazbalkera, razdana gan bat guazaf sutesik, bata kotcoba danedir da ayazaava ko mekak riwe al jiadawer, da tawava vugeke al divvawar da di co-tiyir kiewega ke lan bliind minon volrotenvan.

Va cuisaf kalfrancavaks ke Dessault W- gobelit, i va inyona mekeyena kosmara icde abdiassurafa avopa, i va kosmara mafelana goxe loon dene divexo ( koe Germana is Engla ) dam dene inafa guga. Bat tcumpaf grupeik va yoni wexayesi krentki ke tciamaf suteks al djuprobeitar. Va sini pu saneg valeveon firví, nume sini va djumexulera va ilamtafa neva ke Feliik rotir daskitid.

### V : Male neva ke Baxun

Xipehuz tire tid blisik. Kota inafa askirinda va kuranira ik rinta ik gesiara ik pakafa volruptesuca karavar, i va kotcoba soltrakusa va sulemaf tisik gu ruxa ok foyokafa coba. Beka inafa nirinda doluneson me rogotur ( opelafa kildera moo sid ), drikon rowit da in eron vodjur. Levgon givukir, va onkara va milaptik giliper, toltolon ok barbaron gigozar, va gedrafa abduabara nedir, va kon dositik gilisker aze va ar kazokever. Va aal me grupurper, vexe guiveson kan merokosman mergil va zveri grupatar. Bat tisik va aalxof sulem gilivamudad oke kadime amna giked ; kotviele atad aze troked. Va vexe roruyet da va kot sulem mesolwison sokatad, ede rotuzad, ise va batcoba dandackiskon askid kire me raweyad, voxe tuguboyackad.

Sinafa trokerinda va mek teyak sodiner : omavafu baponu va bata sopura sostaper. Sotre sanoy ok tol-sanoy, aname atayan sulemap va sint ivamukoron gikatanad aze va yona olya ben niskarenta vanmilenidasid. Icde sulemam ( tulon zveri ), olya ke tanoy Xipehuz tisik ta tuguboyara sostaper. Katcalat da rowarzen idul me tir vere tizaf. Va olyara ke Xipehuz tisik ben nuba jontikviele al kazawar aze alma anton vanion toz tuidulawer.

Me grupé kase rokalit da Xipehuz tisik tir dem gedraf tazuk kire kot va int gu fey az akinta az bada robetar, ise batcoba bal tanoy afizcek. Sinafa kseva dun arapenir, ise folí da batcoba gu artazukereem ke afi mali gazda kali siel az mali siel kali gazda jadion zo royofter. Wori konak arapenis nideks va rinta ke olkik is apton sinyona skeura nudaned, tode rokalí, nume va geltrafa altozafa muxara batinde tadled, voxe nekev lujafa vayara, va telyona lodopelafa anton sazdason al rogotú. Tulon, va zides nideks gu zijnaf nideks meviele al rosolwí. Mancoba efe co-tiyir taneafa mana kosmara.

**Xipehuz tisik**, ke J.-H. Rosny Aîné ( 2<sup>eafa</sup> zixa ; wana titisa koe diref otuk )

Xipehuz tisik, gestaropaf berpotam (1887) ke J.-H. Rosny Aîné belgaf suterotik  
Xanto : *Les Xipéhuz*, francavon, kalkotavayano gan Damien Etcheverry, 2014.  
Dotay : Kotavaxak dem Suterot.





## Félix Vallotton ( 1865-1925 ) ~ Swizaf lingsik

Félix Vallotton tir lingsik is gretcasik is balumasik is yambaf malyopasik is berpotik.

### Blirizva

Félix Édouard Vallotton ba 28/12/1865 koe Lausanne koe Swiza koblr lize gadikye va neladolexe gedir. In va pulukaca vayar aze gu Latinava is Ellasava zo dobar, exaksason va griva mu yambeem is lingeropa. Félix Vallotton ko Paris lapir lize dene Julian Cultim raver ; kalion zo tcalar nume va jupekana denfira va Yambafa Bema bak 1883 elicer. Bal tilderugal ko Swiza belon dimdenlapir lize va jontik swizaf yambik ( Biéler is Reichlen is Gaulis is Blancpain ikz- ) rungruper, ise va Charles Maurin is Félix Jasinski dere tunar. Va delt skeur. Inafa yamba gu taveyena cultimeva va int loloviele tunuyackar.



Yambik tir erbagekirapaf. Dene Meruptesikaf Bontay ( 1891 ) taneatomon wonar. Moi 1890 va inta toz gretcar ise va gretcaks kan eau-forte ckane skur, malgrupeson va Rembrandt is Millet. Inafa mana toltuwarzara va bate savsafe ckane jupar da in kalion walvedeyon zo tufiuntar, dum yambik vabdue wituca.



Tis nik ke Vuillard is Bonnard is Maurice Denis, va Nabi rijay denfir aze vanpir dalaf yunkesik va Revue Blanche virda. Bak 1899 va nazbeikya ke Alexandre Bernheim zolonaf trutcadolesik kurer, numen batcoba va klepaviank tcalar. Batvielu va lingeropa ektudar, i va taneafa kubla.

Bak 1900 gu Franca zo tuvedeyotar. Inafa yamba va prostewa me joar voxe kan gijarotifa zikesa keska romplekur, is kan lana luistava lize odjafa uka gu losizuntasa kseva fereon kevaxasa vox dile mekramafa zo goated. Tison loeke meruptes, va anulaf martig bad konaka tanda buner. Ostik Félix Vallotton tir sporgaf zovdasik, va balumaropa yovar, ise suter : yambaf malyopaks is berpot is wenyaxa is vayarundeks is pone ikz-.

Birgaf vox skeus, undesaf is dreladaf, ayafimaf nek brostasaf, jugemes va kaluca vox va int farius gu meja, bat ayik tir birtaf lidamen inafa yamba tir grupeafa nekev laviafa opeluca. Tiyr ke targaf yambikaf rijay ise va kota walvedeyafa wonara pakeyer, don taneaf Muvugalaf Bontay bak 1903 az koe Wien ( Ostera ) lize va mon sanoya trutca atoyer nume gan Gustav Klimt is Hödler zo sendayar.

Vallotton jontikviele koyar, koe Germana is Nederlanda is Sverige is Italia ikz-. Bak 1909 do Vuillard is Bonnard is Denis is Roussel va zabdura va Ranson Cultim paker edge Künstlerhaus tcila koe Zürich va taneafa inon varon ektudana wonara grustar. Ara wonara radimifid.



## Recela 1 : Shinagawa

Recela 1 : Shinagawa tir toleafa gweta ke sposaf gwetak vergumveltkiraf gu 53 recela ke Tōkaidō vawa ( Tōkaidō Gojūsan-tsugi no uchi ), zovdayan gan Utagawa Hiroshige niponaf yambik, is taneon piskuyun bak 1833-1834 gan Hōeidō.

Tōkaidō vawa tiyir vawapa wale Edo ( re Tokyo ) tiso kelu ke Shogun patectokilik is Kyoto gindafu kelu ke Nipona. Sareon gu Hiroshige, kotafa soluma tiyir vas mon 500 km- numen lanis koyasik bad mon toloya safta exuleyed.

Hiroshige va varaf gwetak dem 53 recela ke zalor zovdayar. Bata gweta ( Ukiyo-e tazuk ) tir lumkirafa gu 37 × 25 cm- ( Oban breviz ). Tir toleafa ke enk ise va greelt koe Shinagawa kaatoer.

### Greelt ke Shinagawa

Greelt koe Shinagawa tiyir taneafa recela ke Tōkaidō vawa.

Shinagawa gee savsafa Tokyo widava tigur, kene Tokyo ceda lize moltafa tegira dun tiyir zolonafa mali konaka decemda. [...]



Xantofa piskura : 1833-1834 gan Hōeidō



Piskura : Gyosho enk, 1841-1844 gan Ezaki



Piskura : Reisho enk, 1847-1852 gan Marusei



Utagawa Hiroshige lingesik  
( 1797-1858 )

Varaf teliz tigus koe Kotava Xadola dene Wikipedia.

~ Banliz : [https://avk.wikipedia.org/wiki/Recela\\_1\\_-\\_Shinagawa\\_\(gweta\)](https://avk.wikipedia.org/wiki/Recela_1_-_Shinagawa_(gweta))





# TAMAVA IS TAWAVOPA

## Amsterdam ewala

Amsterdam ewala tir francafa ewalama koe geefa India Welfa. Do Saint Paul ewala ( arte geeon 85 km- ) va aptafa utca tadler, va tanoya ke alubaf utcatum ke Francaf Geefa is Antarktikaf Tawayeem ( TAAF francavon ).

Amsterdam ewala tir granamafa tculxantafa ewala vas 58 km<sup>2</sup>. Tir cugon abrotcafa vas 10 km- ( lentugeon ) is mantafa vas 7 km- ( talturonon ). Taltefa pakava tir domanafa gu ontinaf kirieem ( 400/700 m- ) voxen ronefa pakava kale bira lozijnon tulodomawer. Mont de la Dives mefta, ane ontime ke ewala, vas 881 m- waltodar. Raporaf is vurjiskaf krimteem va drikafa vantotara me nover, vaxeon lenton lize irubaxo tigr.



Inafa lidawicka tir welfon zakodafa, menoldasa is metapasa vox elupkon taltusukasa. Ewala tir lolenteon dam "antarktikafo vanmilenidaxo", tuwavafa birakima wale idullaveem ke India Welfa is fentlaveem ke Antarktika Welfa. Mesukason mialukafa yanka tir vas 16°. Vertokaya wegona tiyir vas 26° voxen ana domafa yanka tiyir vas 1.7°.

Meka irubasa sanelia moe ewala tigr, voxen mali 1949 Martin-de-Viviès sazopafo irubaxo va opafa vuida ( dem mialukon 25/35 korik ) cadi-meon gilemuder.



Anamefa bira tir kabaykirapafa isen draje ( *Jasus paulensis* ) tulon zo saver.

### Lidawicka ke Amsterdam ewala

Tisa lidawicka ke Amsterdam ewala laneke sotir zakod, vektas gu tela ke Bretagne gola ke Franca.

Lidawicka ke ewala tir zakodon welfordafa. Vanmilenidas seg ke yon bwaf is antarktikaf salt arte geeon mon 600 km-

tigr isen birayanka vas 12° bak anyusteaksat ik 18° bak toleaksat sokarapaniwer. Bravana gaelyanka tir mon 14°. Welfafa flava aname ewala va gijarotifa yankafa tubelasaca tadled ise va bat cadimeaf tustam nud. Volson, va lana keska ke lidawickafa tuidulara ton laumasa ota dem viel tis ton yanka lofa vas 20° banlize dere dizvet.

Abda gitir ontinafa ise aksataksaton abiceke arapeniwer ( 80 % bak bareaksat ik 83 % bak santaneaksat ). Batcoba gan jontika bra is feref omaf rujodpij dalon zo nekir. Nobuca ke sel luxeon tir axackafa vas mon tandeafa tanka. Muveka aultovecker, ton tandeaf mialuk vas 1114 mm- bad riwe 240 viel. Muvarama loote tir.

Onotcacek ik drozacek ik noldacek mo ticak ke ewala fentugalon rotir zo dizved. Aksat wali santoleaksat is bareaksat sotid loote muvas. Rodugalam bak toleaksat is bareaksat krulder, voxen keska koe titak gan remlucapa is lavakagisa rotirama ke raporafa levebada zo laumasir.

Awaltareka tir zolonackafa, dalon bak santoleaksat ik bareaksat.

Suka tir lidawickafa tadxexapa ke bata gola, ton mialukafe kalie vas 27 km-/b- is 150 viel dem sukarapa ( lofa gu 16 m-/v- trabe 55.6 km-/b- ). Taltafa is lenttaltafa sukara loote tid.

## Izva

Ba 18/05/1522 tici anamelapira va tamava, mobliyiis dositik ke Magalhães dirgan gan Sebastián Elcano koe Victoria tota va refa Amsterdam ewala kosmayad. Pone ke Francisco Alvo stedasik icdeon tir tazuktafe. Stragayar da ba bana evla, tota remlapisa va geef laksiwak vas 37°35' poka lana ontinafa ewala wison tigrir, i va ewala dem anamez vas peroy "lieue" solumolk nutisa irubasikiskafa, voxe nekev konaka yawara me rodumur.

Ba 11/06/1633 nederlandaf Van Diemen bowesik totalapis van Java va bata ewala is bana direfa Saint-Paul kozwir numen va bata lentefa gu Nieuw Amsterdam yoltayar. Taneafa divtotara bak 1696 oxam sokiyr, ke De Vlaming xollandik. Inafa nega va pinta icde Amsterdam abicote bilder voxe vas dulapafa pimtara va Saint-Paul ruldar.

Bak 1792 Entrecasteaux rambik is Huon de Kermadec lapis kal Tasmana kabdue Amsterdam ba 28-29/03 greeltad nume va taltefa krimta roliwotamar.



Fernand mefta is kiria, savsaf tculk, vatalteon



La Dives skarn, vegetalteon



Bak 1843 kazafu sistu ke Reunion ewala va onasa recela moe Saint-Paul ewala grustar numen Marin Dupeyrat totas redakik va francaf nilt moe Amsterdam ewala isu Saint-Paul ticapter. Abic sayakik is onasik koe Saint-Paul zo inke voxen onasa recela arti sanda zo jovler.

Bak 1871 Amsterdam ewala gan lan bonias veskik yoltkiraf gu Heurtin abicedje zo kereler. Bantan va tawamidura is vartera lwimir voxaze arti tanoya tanda jovler. Kobureyen jaftol soe di zavzagid aze koe ewala jonkaweted.

Amsterdam ewala bak 1892 gan Franca winugon zo kodigir. Mali 1949 Martin-de-Vivès opaf widel poka lentefa krimta zo inker aze va vuida tandeon dun vedgober, i va vuida dem 23 ik 35 korik bak idulugal.



## TELIZ

2<sup>e</sup> bu : Danebury, keltafa ralma  
2<sup>e</sup> bu : Kotavaf Izvugalayak  
4<sup>e</sup> bu : Xipehuz tisik, berpotam  
8<sup>e</sup> bu : Félix Vallotton, lingesik  
9<sup>e</sup> bu : Recela 1 : Shinagawa  
10<sup>e</sup> bu : Amsterdam ewala  
12<sup>e</sup> bu : Liwombura  
12<sup>e</sup> bu : Kuda ke Aisopos

## LIWOMBURA

Tula va liwa ke lana ombaliwa watson gu alto.  
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/09/02/un-jeu-de-7-familles-en-kotava-2/>

## Kotavusa virda

Virda kotavon sanelayana, nuyon is faston  
romalvajana is rorubiana is rotamzilina.  
Ickriluyun rokeem. PAG / DE.  
Internetxo : [www.europalingua.eu/KotavusaVirda](http://www.europalingua.eu/KotavusaVirda)  
Bu : [www.europalingua.eu/KotavusaVirda/2-e\\_otuk\\_12-2022](http://www.europalingua.eu/KotavusaVirda/2-e_otuk_12-2022)

Sanegara : Santoleaksat ke 2022. 2<sup>e</sup> otuk.

Yunkeks is ewava : ewaveem abugaf gu roka ok  
nuyon rotamuzen ok rictayan gan digisik.

1

Loma  
NISKA

ALTO

FR  
crâne

**Oria**



Oria sotir niskafe borkorafe dre ke taka is  
vamoefti ki ke yup. Va kerava is noglabolk  
sonendar ise va yona nelkafa pestafa vila  
sodir. Va konaka aptafa niska dir.

oria - prijust - torestava - krimba - woyail - idala

## Okol is astol

Ayik va okol is astol digiyir. Lanvielon sin koyad. Moe kelda, astol pu okol kalir : « Va vajki ke jin naril, ede va jinafi bli lotil. » Okol oblakabuder, aze astol, cuerses, luber aze awalker. Bam felik va kotcoba mo okol vajar, is va dace astolalma. Kle okol repaleson kalir : « Ax ! tí mefalaf ; mancoba ben jin batinde al sokir, kax ! Lecen va pornam me al djuvajá, kle re burersé, va kotcoba don dace alma. »

Bata kuda nedir da, ede gijik va pinik vangluyar, pune sin va bli soravaldad.

Kuda ke Aisopos, -VI<sup>-eafa</sup> decemda  
( kalkotavaks gan Yurani Andergan )

